

Pobjednik natjecanja u pisanju govora Miodrag Jovičić «Pravi neprijatelji su siromaštvo, glad, bolest i nevolja»



Visoki predstavnik i specijalni predstavnik EU Valentin Inzko danas je 25-godišnjem Miodragu Jovičiću, ekonomisti iz sjeverne Bosne, dodijelio nagradu u iznosu od 1000 KM za njegov rad koji je pobijedio na natjecanju za pisanje govora koje je ljetos organizirao OHR.

Građani BiH u dobi između 18 i 35 godina su pozvani da napišu kratak govor koji bi pomogao poboljšanju političke atmosfere pred opće izbore 3. oktobra.

Od natjecatelja je zatraženo da sebe zamisle na poziciji predsjedavajućeg Vijeća ministara BiH.

Pobjednički govor gospodina Jovičića kaže da, iako su najprosperitetnije zemlje u svijetu multikulturalne, Bosna i Hercegovina još uvijek nije uspjela svoju raznolikost pretvoriti u prednost. On naglašava da je ovo moguće ukoliko građani prepoznaju ono što im je zajedničko, a ne da se fokusiraju na ono što ih dijeli.

«Mi nismo neprijatelji jedni drugima», piše gospodin Jovičić. «Naši pravi neprijatelji su siromaštvo, glad, bolest i nevolja» i ovi problemi, zaključuje on, mogu se riješiti zajedničkim zalaganjem.

Donoseći odluku da nagradu dobije gospodin Jovičić, visoki predstavnik i specijalni predstavnik EU je rekao da je ohrabren snažnim i kreativnim odazivom koji je OHR-ovo natjecanje u pisanju govora proizvelo.

«U većini radova autori su pozvali političare u Bosni i Hercegovini da se fokusiraju na rješavanje stvarnih problema građana – nezaposlenost, kriminal, korupciju, neadekvatnu socijalnu skrb i nedovoljno finansirane škole», izjavio je visoki predstavnik i specijalni predstavnik EU.

«Ukoliko građani zaista žele kraj nepopustljivosti i zastoju i novi početak za sebe i svoju djecu, onda moraju glasati», rekao je on. «Veliki odziv u nedjelju povećava šansu da će se problemi koje spominju autori govora rješavati na ozbiljan način u narednim godinama.»

Puni tekst pobjedničkog govora gospodina Jovičića je dostupan na

https://www.ohr.int/ohr-dept/presso/presssp/default.asp?content_id=45346. Isti tekst te tekstovi autora koji su osvojili drugo, treće i četvrto mjesto odnosno Jasmine Ahmetović, Renate Radić Dragić i Drage Gajić bit će dostupni na web stranici www.reci.ba